

Kalaallit Nunaanni aalisarnermi pisarineqartut isumalluutini atuinnermut akitsuutaat pillugit Inatsisartut inatsisaat

Akitsuummik akiliisussaatitaaneq

§ 1. Suliffeqarfiit aamma inuit Kalaallit Nunaata aalisarnikkut oqartussaaffigisaani, nunat allat aalisarnikkut oqartussaaffigisaanni imaluunniit nunat tamat imartaanni avataasiorluni aamma sinerissap qanittuani aalisarnissamut pisassinneqarsimasut akuersissummilluunniit peqartut pisamik landskarsimut akitsuutaannik, Inatsisartut inatsisaanni matumani aalajangersakkat naapertorlugit akiliissapput.

Imm. 2. Akitsuummik akiliisussaatitaaneq piffissami pisarineqarfianni atuutilissaaq.

Imm. 3. Imm. 1-imi aalajangersagaq apeqqutaatinnagu, Naalakkersuisut aamma nunani allani nunamiluunniit maani oqartussaasut aalisarnek pillugu isumaqatigiissutaat naapertorlugit Kalaallit Nunaata aalisarnikkut oqartussaaffigisaani aalisarnek inatsimmi matumani pineqatunut ilaangilaq.

§ 2. Akitsuut akilerneqartussanngussaaq:

- 1) pisat Kalaallit Nunaannit anninneqarfianni,
- 2) tunitsivimmut tunisassiorfimmulluunniit, matumani aamma umiarsuarmut tunitsivimmut tulaassinnermi,
- 3) inummut pingajuusumut tunniussinnermi.

§ 3. Avataasiorluni raajarniarnermi, qaleralinniarnermi, saarullinniarnermi, saattuarniarnermi, kullererniarnermi, saarulliusaarniarnermi, suluppaagarniarnermi uiluinniarnermilu akitsuutit §§-ini 4-miit 7-imut maleruagassat naapertorlugit akilerneqassapput.

Imm. 2. Sinerissamut qanittumi raajarniarnek qaleralinniarnerlu §§ 4-7-mi malittarisassat naapertorlugit akitsuuteqartinneqassapput.

Imm. 3. Avaleraasartoorarniarnermi, ammassassuarniarnermi, ammassanniarnermi, saarullernarniarnermi guldlakserniarnermiluunniit akitsuutit § 8-mi maleruagassat naapertorlugit akilerneqassapput.

Imm. 4. Aalisakkat allat imm. 1-imiit 3-mut taaneqanngitsut kiilumut akitsuutaat 0 kr.-iuvoq.

Akitsuusigassat

§ 4. Akitsuut tunisinnermi, tassa pisat tuninneranni tulaanneranniluunniit akiusup procentinngorlugu ilaanit akilerneqassaaq. Tunisinnermi aki tassaavoq aki pisisumit tunisisumillu isumaqatigiissutaasoq, tassunga ilanngullugit bonusiujunnartut, assartorneqarnerannut tapit il.il., aammalu tuniniaanermi aningaasartuutit, assartuineq il.il. ilanngaatinagit.

Imm. 2. Nunanut allanut nioqquteqartup Kalaallit Nunaanniit Kalaallit Nunaata avataani apuuffissaannut assartuinermit aningaasartuutit ilanngutinngippagit, tunisinermi aki pisanut akitsuusigassanut kiilumut 1 kr.-imik qaffanneqassaaq.

Imm. 3. Tunisinermi akigititaq imminnut attuumassuteqanngitsumik niuertut akornanni niuernermit allaanerusumik aalajangersarneqarsimappat akileraaruseriffiup tunisinermi akigititaq aalajangersarsinnaavaa, niuertut imminnut attuumassuteqanngitsut niueqatigiinnerminni angusarisinnaasaannut naapertuuttumut.

Imm. 4. Sillimmasiissutit taarsiivigineqarnerillu tunisinermi akisulli isigineqarput.

Tunngaviusumik akitsuut

§ 5. Pisanik inummut pingajuusumut tunniussinermit imaluunniit Kalaallit Nunaannit annissinermit akitsuut kiilumut 0 kr. 20 øre-ussaaq, aalisagaqatigiit kvartali annissiffusoq tunniussivisorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 12 kr.-init minneruppat.

Imm. 2. Tunitsivimmut tunisassiorfimmulluunniit tulaassinermit akitsuut kiilumut 0 kr. 5 øre-ussaaq, aalisagaqatigiit kvartali tulaassiffusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-init minneruppat.

Isumalluutininik atuinermit iluanaarutinit akitsuut

§ 6. Pisanik inummut pingajuusumut tunniussinermit imaluunniit Kalaallit Nunaannit annissinermit akitsuut tunisinermi akisup 5 procenterissavaa, aalisagaqatigiit kvartali annissiffusoq tunniussivisorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 12 kr.-iuppat angineruppalluunniit, taamaattorli tak. imm. 3.

Imm. 2. Aalisagaqatigiit kvartali annissiffusoq tunniussivisorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 17 kr.-init angineruppat, akitsuutip procentia aalisagaqatigiit tunineqarneranni agguaqatigiissillugu akiat kiilumut 17,00 kr.-i qaangerlugu koruunit aallartinneri tamaasa 1 procentpointimik qaffattassaaq, tak. imm. 4.

Imm. 3. Akitsuutip procentia 17,5 procent qaangissanngilaa.

Imm. 4. Tunisinermi agguaqatigiissillugit akit aamma akitsuutit procentii, kvartalit akitsuutit atuuffissaat kingusinnerpaamik sapaatip akunneranik ataatsimik sioqqullugit akileraaruseriffiup internetikkut nittartagaatigut tamanut saqqummiunneqartassapput.

Imm. 5. Qaammatit pingasukkaat ingerlaneranni ukiup siuliani aalisakkamut akitsuuserneqartussaataasumut pisassanit tulaanneqartussaataangitsunit 10 procentinit ikinnerusut avammut anninneqarnerani, aalisakkaq akitsuuserneqartussaataasup akitsuuserneqarnerani toqqammavissatut ukiup siuliani qaammatit pingasukkaat pisassat tulaanneqartussaataangitsut kingullermik 10 procentinik amerlanerusunik avammut anninneqarnerani agguaqatigiissillugu tunisinermi aki atorneqassaaq, takuuk imm. 1 aamma 2.

§ 7. Tunitsivimmut tunisassiorfimmulluunniit tulaassinermit akitsuut akisup 5 procenterissavaa, aalisagaqatigiit kvartali tulaassiffusoq kvartalinik marlunnik sioqqullugu tunineqarneranni

agguaqatigiissillugu akiat kiilumut 8 kr.-iuppat angineruppalluunniit.

Imm. 2. Akitsuummik akiliisoqassanersoq akileraaruseriffiup internetikkut nittartakkamigut, kvartalit akitsuutit atuuffissaat kingusinnerpaamik sapaatip akunneranik ataatsimik sioqqullugit tamanut saqqummiuttassavaa.

Imm. 3. Qaammatit pingasukkaat ingerlaneranni ukiup siuliani aalisakkamut akitsuuserneqartussaataasumut pisassanit tulaanneqartussaataasunit 10 procentinik ikinnerusut pisarineqarpata, aalisakka akitsuuserneqartussaataasup akitsuuserneqarnerani toqqammavissatut ukiup siuliani qaammatit pingasukkaat pisassat tulaanneqartussaataasut kingullermik 10 procentinik amerlanerusunik pisaqarfusumi agguaqatigiissillugu tunisinermi aki atorineqassaaq, takuuk imm. 1.

Imm. 4. Uiluinnik inummut allamut tunniussinermi imaluunniit Kalaallit Nunaanni annissinermi akitsuut akiusup 5 procenterissavaa.

Aalisakkanik ikerinnarsiortunik aalisarnermi akitsuutit

§ 8. Angallatinut Kalaallit Nunaanni angerlarsimaffeqartutut aamma Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasunut tunngatillugu akitsuutit ima angissusilerneqarput:

1) Ammassassuaq,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq..... kiilumut 0 kr. 25 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 80 øre.

2) Ammassak,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoqkiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 70 øre.

3) Avaleraasartooq,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 40 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq kiilumut 1 kr. 00 øre.

4) Saarullernaq,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 70 øre.

5) Guld laks,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq kiilumut 0 kr. 70 øre.

Imm. 2. Akitsuut pisat uumatillugit oqimaassusiat naapertorlugu naatsorsorneqassaaq.

Imm. 3. Aktie- imaluunniit anpartsselskabip Kalaallit Nunaanni angerlarsimaffeqartup angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq inuttaqartinnagu, kisiannili angallatip naalagaa, maskinmesteria taakkuluunniit marluk kisiisa ilanngullugit attartorpagu, akitsuutit angallatinut Kalaallit Nunaanni angerlarsimaffeqartutut nalunaarsorneqarsimasunut atuuttut akilerneqassapput.

Piffissaq akitsuusiiffissaq aamma akisussaaneq

§ 9. Piffissaq akitsuusiiffissaq tassaavoq kvartali.

§ 10. Inatsimmi matumani aalajangersakkat naapertorlugit akitsuutit akilerneqarnissaannut akisussaasuvoq pisassinneqarsimasooq akuersisummilluunniit peqartoq.

Imm. 2. Aalisarneq pisassiissutit akuersisutilluunniit aalajangersimasut naapertorlugit ingerlanneqanngippat aalisarnermik ingerlataqartoq akitsuutit akilerneqarnissaannut akisussaassaaq.

Akitsuutininik unerartitsineq

§ 11. Tunitsivimmut tunisassiorfimmulluunniit tulaassisoqartillugu, tulaassinermut atatillugu akiliutissanik tunniussisussap akitsuut akiliutissanit unerartissavaa. Unerartitsineq pissaaq unerartitsisussaasup aningaasanik unerartinneqartussanik naatsorsuineratigut, aningaasanillu taakkuninnga akiliutissanit ilanngaatinnginneratigut.

Imm. 2. Unerartitsisussaasooq naatsorsuusiussaaq, akitsuutip naatsorsorneqarnissaanut akitsuutillu eqqortumik akilerneqarnissaata nakkutigineqarnissaanut tunngaviusussanik.

Imm. 3. Kinaluunniit akitsuutininik ilanngaassisussaananerminik naammassinninngitsoq taakkuluunniit minnaarlugit ilanngaassisoq, tak. § 11, imm. 1, aningaasat amigaataasut akilernissaannut akisussaavoq, pineqartup Inatsisartut inatsisaanni matumani aalajangersakkanik maleruaaniarnermini sumiginnaasimannginnera uppersarsarneqanngippat.

Imm. 4. Akitsuummik Inatsisartut inatsisaat manna naapertorlugu unerartitsisoq, aningaasat unerartinneqartut akilerneqarnissaannut akisussaasuvoq.

§ 12. § 11 naapertorlugu unerartitsisussaasup, piffissap akitsuusiiffiusup qaangiunnerani, kingusinnerpaamillu piffissap akitsuusiiffiusup qaangiunnerata kingorna qaammammi ulluinnarmi kingullermi:

- 1) akitsuusigassat nalunaarutigissavai,
- 2) taakku akitsuutitaat unerartinneqartoq nalunaarutigissavaa, kiisalu
- 3) akitsuut akileraaruseriffimmut akilissallugu.

Imm. 2. Nalunaarummut ilanngullugit nassiunneqassapput uppersarsaatit il.il. nalunaarummut tunngavigneqartut assilineqarneri.

Imm. 3. Nalunaarut imm. 1-imi pineqartoq piffissaagallartillugu nassiunneqanngippat akiliitsissut piffissami akitsuutip akilerneqartussap 2 procentianik angissusilik, taamaattorli minnerpaamik 500 kr.-iusoq akilerneqassaaq.

Imm. 4. Unerartitsisuussaasup naatsorsuusiornissaa, allaffissornissaa il.il. pillugit maleruagassat sukumiinerusut Naalakkersuisut aalajangersarsinnaavaat.

Tunngaviusumik akitsuutip, isumalluutini atuinermi iluanaarutinit akitsuutip kiisalu aalisakkanik ikerinnarsiortunik aalisarnermi akitsuutit akilerneqarnissaat

§ 13. Suliffeqarfiit inuillu akitsuutini akiliisussaasut § 1, imm. 1-imi taaneqartut tunisat, annissuinerit il.il. pillugit naatsorsuusiussapput, akitsuutip naatsorsorneqarnissaanut akitsuutillu eqqortumik akilerneqarnissaata nakkutigineqarnissaanut tunngaviusussanik.

Imm. 2. Suliffeqarfiit inuillu akitsuutini akiliisussaasut § 1, imm. 1-imi taaneqartut, piffissap akitsuusiiffiusup qaangiunnerani, kingusinnerpaamillu piffissap akitsuusiiffiusup qaangiunnerata kingorna qaammammi ulluinnarmi kingullermi:

- 1) akitsuusigassat nalunaarutigissavaat,
- 2) taakku akitsuutitaat nalunaarutigissavaat, kiisalu
- 3) akitsuut akileraaruseriffimmut akilissallugu.

Imm. 3. Nalunaarummut ilanngullugit nassiunneqassapput uppersarsaatit il.il. nalunaarummut tunngavigneqartut assiligneqarneri.

Imm. 4. Nalunaarut imm. 1-imi pineqartoq piffissaagallartillugu nassiunneqanngippat akiliisitsissut piffissami akitsuutip akilerneqartussap 2 procentianik angissusilik, taamaattorli minnerpaamik 500 kr.-iusoq akilerneqassaaq.

§ 14. Naalakkersuisut inuit selskabillu il.il. akitsuutini piffissaagallartillugu akiliisimangitsut, § 12, imm. 1-imi, imaluunniit § 13, imm. 2-mi taaneqartumit sivikinnerusumik akiliinissamut piffissalersinnaavaat, akitsuutillu akilerneqarnissaanut qularnaveeqqusiisoqarnissaa piumasarsinnaallugu.

Piginnaatitsineq

§ 15. Inatsisartut inatsisaata atuutinneqarnissaa aammalu tulaassinerup qaqugukkut pisarnera pillugu maleruagassat erseqqinnerusut Naalakkersuisunit aalajangersarneqarsinnaapput.

Misileraalluni aalisarneq

§ 16. Naalakkersuisut akitsuummik akiliinnginnissamik qinnuteqaat akuerisinnaavaat misileraalluni aalisarnissaq peqassutsimut imaluunniit inuussutissarsionermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertunngippata.

Pineqaatissiinerit

§ 17. Piaaraluneerluni mianersuaalliorujussuarluniluunniit § 1, imm. 1-imik, § 11, imm. 2-mik, § 12, imm. 1-imik imm. 2-milluunniit, § 13, imm. 1-imik imm. 2-milluunniit unioqqutitsineq, imaluunniit sivikinnerusumik piffissaqarluni akiliinissamik § 14 naapertorlugu peqquneqarsimanermik qularnaveeqqusiinissamilluunniit

pequneqarsimanermik malinninnginneq Kalaallit Nunaanni Pinerluttulerinermik inatsimmi maleruagassat naapertorlugit pineqaatissiissutigineqarsinnaavoq.

Imm. 2. Kalaallit Nunaanni Pinerluttulerinermik inatsimmi maleruagassat naapertorlugit akiliisitsinissaq, maleruagqusani Inatsisartut inatsisaat manna naapertorlugu atuutilersinneqartuni maleruagassiuunneqarsinnaavoq.

Imm. 3. Inatsisartut inatsisaat imaluunniit maleruagqusat taanna naapertorlugu atuutilersinneqartut akiliisitsissummik aalajangersaasinnaanermik periarfissiippata, inatsisit malillugit inuttut isigineqarsinnaasoq Kalaallit Nunaanni Pinerluttulerinermik inatsimmi maleruagassat naapertorlugit akiliisinneqarsinnaavoq.

Imm. 4. Imm. 1-imiit 3-mut naapertorlugit akiliisitsissutit landskarsip pisassarai.

§ 18. Unioqqutitsineq akiliisitsissutip saniatigut annertunerusumik malersorneqartariaqanngitsutut akileraruseriffimmit nalilernerqarpat Naalakkersuisut, Naalakkersuisulluunniit tamatumunga piginnaatitaata pineqartumut nalunaarutigisinnaavaat suliassaq eqqartuussinertaqanngitsumik naammassineqarsinnaasoq, pineqartup unioqqutitsinini nassuerutigippagu akiliisitsissullu nalunaarummi taaneqartoq piffissap erseqqinnerusup, qinnuteqarnikkut sivitsorneqarsinnaasup ingerlanerani akilerumappagu.

Imm. 2. Nalunaarutiginninnermut imm. 1-imi taaneqartumut atatillugu Kalaallit Nunaannut eqqartuussisarnermik inatsimmi maleruagassani unnerluutiginninnermut allassimasut atuutissapputtaaq.

Atortuulertia

§ 19. Inatsisartut inatsisaat 1. januar 2018-imi atortuulissaaq, atuutissallunilu aalisakkanut 1. januar 2018-imi kingusinnerusumiluunniit aalisarneqartunut tunniunneqartunulluunniit.

Imm. 2. Ilutigitillugu atorunnaarsinneqassapput:

- 1) Qalerallit aamma aalisakkat allat ilaasa akitsuutaat pillugit Inatsisartut inatsisaat nr. 11, 3. december 2012-imeersoq,
- 2) Raajanut akitsuutit pillugit Inatsisartut inatsisaat nr. 20, 25. oktober 1990-imeersoq aammalu
- 3) Aalisarnermut atatillugu atuisunut akiliuteqartitsineq pillugu Namminersorlutik Oqartussat nalunaarutaat nr. 9, 27. juni 2013-imeersoq, taamaattorli tak. imm. 3.

Imm. 3. 2018-imi kvartalimut siullermut aappaannullu akitsuutit procentii angissusilerneqassapput qalerallit, saarullit, suluppaakkat, kullerit, saarulliusaat, uiluiit saattussallu nunanut allanut tunineqarneranni kvartalimut agguaqatigiissillugu akit pillugit paasissutissat, Danmarks Statistikip nunanik allanik niueqateqarneq pillugu kisitsisaataaneersut tunngavigalugit. Raajanulli tunngatillugu tunngavigneqassapput akit pillugit paasissutissat inuussutissarsiummik ingerlatallit, Raajanut akitsuutit pillugit Inatsisartut inatsisaat nr. 20, 25. oktober 1990-imeersoq naapertorlugu Akilerartarnermut Aqutsisoqarfimmut nalunaarutigisimasaat.

Imm. 4. Raajanut 2018-imi tuniniagassatut nunanullu allanut nioqqutissatut kilisaatinit tuni-sassiorfiutigisunit 2017-imi aalisarneqartunut tunngatillugu akitsuut, Raajanut akitsuutit pillugit Inatsisartut inatsisaat nr. 20, 25. oktober 1990-imeersoq naapertorlugu akilerneqassaaq.

Namminersorlutik Oqartussat, ulloq 23. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut